

Paur kute Ximoximã pi'ôk kumrëx no'ôk ne ja.

Paur ne krabê Ximoximã pi'ôk no'ôk ne. Mÿjkôt ne o kra? Jejukôt. Kute kum arënh nhym kute tu amim markumrëxkôt ne o kra. Nhym kam arkum aben kïnhkumrëx ne.

Nhym kam Paur kumrëx ne krïraxbê Epexukam bôx ne kam ar memã Metïndjwÿnh'ã ujarënh ba ne kam tẽ. Nhym kam Ximoxidjwÿ arÿm kam bôx. Kam tën bôx ne kam ar kam memã 'ã ujarënh ba, memã Jeju jarënh ba. Nhym me kwÿ arÿm prïne amikajmãtã Jeju ma. Nhym bep ar kwÿ ne ar arïk 'êx ne kute amijo Jeju mar. Ar kute mar kêt kumrëx ne arïk 'êx ne memã mÿjja jarë. Nãm we ar,

—Kwãrïk wãnh abenwÿr mör kêt, ane. Ne,

—Mrywã kur kêt, ane. Nãm ar ã kupa'ã me akre ar o bao ane. Ar ja 'ã ne Paur Ximoximã kum,

—Dja ga akabëno ar ity gê ar anhikrê, ane. Ne kam ajte me kute amim Jeju mar'ã kum karõ ne kum,

—Ë, Jeju nhõ me jao ba djwÿnhmẽ me atãri àpënhjamẽ gédja ar katàt mrãn memã Metïndjwÿnh'ã ajarë, ane. Ne kam Ximoximãdjwÿ kum,

—Ë, gadjwÿ, gadjwÿ dja ga katàt mrãn Metïndjwÿnh kabënkôt prïne memã arë, ane.

Ne kam ajte me'ã kum karõ, me Metïndjwÿnh kabënkôt katàt mrãnhmã, me mymẽ me niremẽ me ari memã àpënh kajgo ar bajamẽ me 'uwtimẽ, me kunĩ. Me kunĩ ne me Metïndjwÿnh kabënkôt katàt mrãnhmã ajte Ximoximã me'ã karõ. Ne kam me'ã kum pi'ôk no'ôk ne kum ano. Tãm ne ja.

¹⁻² Akmere Ximoxi, ba ibê Paur ne ba amã pi'òk no'òk ne. Ximoxi, ikra djwýnh, amã ne ba pi'òk no'òk ne. Ije amã Jeju jarênh ga tu aje amim markumrêx kôt ne ba arým ajo ikrakumrêx ne. Ba ibê Paur, ne ba amã pi'òk no'òk ne. Djãm ba ne ba Jejumã idjápênh? Kati, Metĩndjwýnhmê Kritu Jeju ar ta ne ar imã idjápênh jarên ijano, ije memã 'ã idjujarênhmã ijano. Metĩndjwýnh, kute gu bapytâr djwýnhjamê Kritu Jeju gu baje amiwýr kam amakjamê, ar ta ne ar imã kabên jarê ba kam arkum idjápênh iba.

Be, gê Metĩndjwýnh ajo djuw mex. Kritu Jeju gu banhõ Bēnjadjwýrmê Bāmbê Metĩndjwýnh ar ukaprĩkôt ajo djuw mex ne ar ajo ba. Gê arkum akaprĩ ne amã umar mex jarê, ga kam adjumar mex ne ar aba.

Kute Metĩndjwýnh kabên jarênh djwýnh 'êxnhĩ bôxmã arênh.

Rô 16.17; Xim k 6.3; Xit 1.10

³ Ê, dja ga arek Epexukam djan nêje ar kukrà. Wānh ne ar kwý arĩk kupa'ã ar memã arênh ba, Metĩndjwýnh kabên kupa'ã ar memã arênh ba. Dja ga nêje akabēno ar ity. Nã bām itēm kutã, pykabê Matenimã itēm kutã amã ikabên jarên kam arým ajbir ajte ar'ã amã pi'òk no'òk ne ano.

⁴ Dja ga arkum,

—Kwārik wānh ar me tūmre'ã ujarênh kajgomê me akukāmāre nhidji me kute tūmrām abenmã arênhja kwārik on wānh nō. Kôt ne me abenmã kabên ar ban kam me kute amim Metĩndjwýnh mar ne 'āno ām kêt. Tām dja on wānh nō, ane.

⁵ Akmere Ximoxi, mýj kadjy ne ba amã ikabên ja jarê? Bir, me kum aben jabê kadjy. Godja me ôkre kadjwýnhbê axwe 'õ nōr kêt ne kute amikam axwe 'õ mar kêt kam arým kôt kum aben jabê. Ne kam ajte me kute mrāmri amim

Jeju markumrêx kôt ne me kum aben jabê. Kadjy ne ba amã ikabên ja jarê.

⁶ Bir be, me kwÿ arÿm kute ja mar prãm kêtkam arÿm kabên kajgoo kumex, ne abenkam kangao kumex. Jabit ne me kuma. ⁷ Djãm me ja kute mÿjja mar got. Kute Môjdjê kukràdjà mar kêtjakam kukràdjà kupa'ã ar memã arênho ba. Ar ta ne ar amijo memã mÿjja'ã ujarênh djwÿnh ne. Ne kute memã,

—Mrãmri ne ba ije me amã arênhja. Kôt ne ba me amã arê, anhÿr ar o ba. Bep kati, ar kute ta amikabên mar kêt ne Môjdjê kukràdjà mar kêt.

⁸ Be, Môjdjê kukràdjàja ne mexkumrêx. Gu arÿm kuma. Ne ren ar kuman kôt ar amijo ba nhym arÿm rãn mexkumrêx. Nhym bep kati, ar ja kute mar kêt ne ar kupa'ã memã arênh ar o ba.

⁹ Be, nhÿnh me jamã ne Môjdjê kukràdjàja? Djãm me kute katàt amijo bajamã? Kati, me kute axweo amiptàr-jamê, me amakkre kêtjamê, me kute Metĩndjwÿnh mar prãm kêtjamê, me axwejamê, me kute mÿjja punubit mar prãmjamê, me kute Metĩndjwÿnh japrÿjamê, me kute nãmê bãm ar parjamê, me kute me parjamê ¹⁰ me prõ nàr mjên prãmjamê, me my ta kute aben nĩnho bajamê, me kute mekbê krao àkĩnhjamê, me 'êxnhĩjamê, me kute me kà mex jarênhamê, nàr me kute mÿjjao amiptàr, Metĩndjwÿnh kute katàt memã amikukràdjà jarênh ne mekbê mÿjja puma nhym me kute o amiptàrjamê. Me ja kunĩ kadjy ne Môjdjê kukràdjàja. Gu arÿm kuma.

¹¹ Nà, Metĩndjwÿnh amikabên nykôt katàt memã amikukràdjà jarê. Djãm kabên ny punu got. Axwe mextire. Metĩndjwÿnh ne mexo, umao me rer mex ne. Nhym kabên nydjwÿ ã mexo, umao ane. Nhym kam ta, Metĩndjwÿnh kĩnh tire ta ne imã amijã ujarênh ny jarên ijano ba kam ô'ã memã arênho tẽ, memã 'ã idjujarênh tẽ.

Kritu kum Paur kaprĩ ne kute àpênh 'ã mênh.

¹² Ë, akmere, mrãmri ne Kritu Jeju gu banhõ Běnjadjwyr amim idja. Kum idjapênhmã ne amim idja. Nãm amikajmã'ã ima, ije 'ã INGRÀ TÛX ne kanga kêt mã kôt tu iman amim idjan imã idjapênh jarẽ.

—Dja ga imã apê, ane. Ne kam kadjy imã tÛX jadjà ba kam kum idjapênh mex ar iban kôt kum amikĩnh jarẽ. Mrãmri ne Kritu Jeju imã mexkumrêx ba kam kum amikĩnh jarẽ.

¹³ Amrêbê ne ba Jeju japry ar o iban arĩk ũno iban Jeju nhõ me jao ibikênhõ iba. Nã bãm te Jejukam ijaxwe nhym tu kum ikaprĩn kam amim idja. Nã, mrãmri ne tu kum ikaprĩ. Kraxje ije amikajmã'ã Jeju mar kêt kam ije amimar kêt nhym bi kum ikaprĩ. ¹⁴ Nãm gu banhõ Běnjadjwyr tu ukaprĩkôt kum ikaprĩ raxkumrêx ne prĩne ijo djuw mex. Djãm ukaprĩ kêt got. Kum ikaprĩ rax ba arÿm jakam ije amikajmã'ã amim markumrêx. Ije amikajmã'ã Kritu Jeju markumrêx ne imã abê:kumrêx.

¹⁵ Ë, mrãmri ne me abenmã kum,

—Kritu Jeju arÿm pykamã ruw, kute me axwe pytãrmã ne ruw, ane. Mrãmri ne me abenmã arẽ. Kaběn ja dja me tu markumrêx ne amijamakkrekam kunhõ. Be, kute me axwe pytãrmã ne pykamã ruw.

Ba ne ba ijaxweo me axwe kunĩ jakre. ¹⁶ Te ijaxwe rax nhym bi kum ikaprĩ rax ne. Jeju Kritu kute akrãnmã meo tēm nhym me kute mar kadjy. Te ijaxwe raxo ije me kunĩ jakrenh nhym mã Jeju kute akrãnmã prĩ'ã ijo tēmja pumũ. Mÿkam? Godja me'õ kute ijaxwe pyrãk ne kute Jeju japry jabej dja ikõpdji'ã ã ikudjwa anen tu amim Jeju kamnhĩxkumrêx ne kam ikudjwa tyk nhijukri tĩn rã'ã rã'ã kadjy. Kadjy ne Jeju kum ikaprĩn akrãnmã prĩ'ã ijo tẽ. Kam ne ba amã,

—Jeju kute me axwe pytãrmã ne pykamã ruw, ane.

¹⁷ Be, Metîndjwÿnh djukaprîja pumû. Kumã dja me rax jarê. Djãm bÿnjadjwÿr ngri got. Dja memã Bÿnjadjwÿr rax rã'ã: rã'ã Bÿnjadjwÿr rax. Dja tyk kêt-kumrêx ne. Me kute noo omÿnh kêt-kumrêx ne. Kubê Metîndjwÿnh pydji. Atemã 'õ kêt-kumrêx. Kumã dja me rax jarÿn kum uma jarÿn mex jarê. Dja me kum arÿnh rã'ã: rã'ã ne. Mrãmri. Tãm ne ja.

¹⁸ Ê, ikra Ximoxi, akmere, ba arÿm amã ikabÿn jarê. Gora ikabÿn ja ma. Amrêbê ne me Metîndjwÿnh kabÿn jarÿnh djwÿnh adjapÿnhmã akabin prÿne adjapÿnh'ã amã karõ. Kõt ne ba amã ikabÿn ja jarê. Ê, dja ga ar ikabÿn ja man kõt atÿx ne. Ê, ba me abenwÿr prõt'ã atÿx jakre. Ê, gora atÿx. Gora atÿx ne amã me uma kêt ne kàj bê memã Metîndjwÿnh kabÿn jarê gê me amikajmãtã kuma. Kute me tÿx kum me uma kêt ne tu kute abenwÿr prõtja pyrãk.

¹⁹ Nà, dja ga ã anen Jeju'ã angrà tÿx ne amim mÿjja mexbit man kõt amijo aban kam amikam ajaxwe 'õ mar kêt-kumrêx ne ar aba.

Nhym bep me kwÿ ne me arÿm Jeju'ã ngrà tÿx kêt ne kõt amijo ba kêt ne kam arÿm kangan amijo ajkê. ²⁰ Be, Imenemê Arexãrimê ne ar arÿm Jeju kangan amijo ajkê. Arÿm ne ar amijo ajkê. Kam ne ba arÿm Xatanajmã ar kanga, ar kute Jeju japrÿ kêt kadjy ne ba arÿm kum ar kanga.

2

¹ Be, akmere, ba amã arê ga aman amû idjô'ã memã arê. Dja me Metîndjwÿnhmã mã kabÿn ne kum me kunÿ jarê. Mã ne mete Metîndjwÿnhmã kabÿn kute? Dja me kum aben jarÿn kum abeno a'uw. Ne kam jãm meo akêx ne me jadjwÿ kum meo a'uw. Ne kõt kum ôdjãnh jarÿn kum amikÿnh jarê. ² Nà, dja gu me kum pykakam me

bënjadjwÿr rÿnhjao a'uw ne kam ajte me bënjadjwÿr kry kute meo ba jadjwÿo a'uw.

Mÿkam? Bir, me kute akrànmã me bajo ba gu me badjumar mex ne ar baba kadjy. Kam dja gu me Metÿndjwÿnh kabënkôt ar baba ne kôt ar amijo baba katàt ne. ³ Be, me ã kute Metÿndjwÿnhmã kabëno anhÿrkam mexkumrëx. Kam dja Metÿndjwÿnh mekam kÿnhkumrëx. Metÿndjwÿnh kubê me bapytàr djwÿnh dja mekam kÿnhkumrëx.

⁴ Nà, kute me kunÿ pytàr prãmkumrëx. Nãm arÿm memã katàt kabën nhym me kute tu markumrëxmã. ⁵ Nà, Metÿndjwÿnh pydjii ne kam ajte kute Bãm'ã me bamënh djwÿnh pydjii, kubêngôkre,* kubê ne Kritu Jeju. Me bajaxwekam ne gu me Metÿndjwÿnh'ÿr babôx kêt ne. Nhym kam kra ta amijo kubêngôkren me bawÿr bôx ne kam Bãm'ÿr me bajo bôx. Gu me kam arkôt baba. Kute Bãm'ÿr me bajo bôx djwÿnh pydjii. Atemã 'õ kêt, kubêngôkre, kubê ne Kritu Jeju.

⁶ Jeju ta, kute memã amikangan me kunÿ pãnh tyk, tãm ne amrëbê Metÿndjwÿnh 'ã akati jakre nhym arÿm 'ÿr bôx nhym kam arÿm amijo aptàn memã amikangan me kunÿ pãnh ty, me kunÿ kute mar kadjy. Me kunÿ kute,

—Mrãmri Metÿndjwÿnh kum me bajabên kute me bapytàrmã, anhÿr kadjy. Kadjy ne ty.

⁷ Kam ne Metÿndjwÿnh ijano ba tẽ. Ba ikumrëx itëm ne ije memã Metÿndjwÿnh kute me utàr jarënhmã. Jeju kute ijanorkôt ne ba me bajtemdjwÿ'ÿr tën bôx ne memã kaj bê Metÿndjwÿnh'ã ajarẽ. Nã bãm memã Metÿndjwÿnh

* ^{2:5} Kritu ne amijo kubêngôkre kute mrãmri ne apÿnh me õ pyka djari kunÿkôt me kunÿ: bêngôkreja pyræk. Kubê kà jakamẽ me kakràtykmẽ me babêngôkremẽ ne me kunÿ: bêngôkre. Me kamrômẽ me kukràdjã kunÿ kubêngôkreo aben pyræk. Jakam dja ga Karõ 17.26 jarën ama.

kabên katàtja, 'êxnî kêtja jarê nhym me amikajmã'ã kuma. Kadjy ne ijano ba tẽ. Mrãmri ne ikabênja. Ijêxnî kêt-kumrêx.

⁸ Ije, ije ar amã Metĩndjwỳnh jarênh gar aje kum akabên-mã ba ate o akno. Ba akubyn ar amã arê gar ama.

Dja pyka kunĩkôt mete abeno bikprõnhkam me my Metĩndjwỳnhmã kabên. Dja me prĩne Metĩndjwỳnhmã amijarê. Me mexo mexkumrêx, me kute mỳjja punu 'õ mar prãm kêt, me ja dja me kum kabên. Nhym bep me ngryknî, me kute kabêno aben japanh, me tãm dja me kum kabên kêt ne.

Me nire kute akràn-mã amijo bamã.

Kô k 14.34; Xit 2.3; Ped k 3.1

⁹⁻¹⁰ Nhym me niredjwỳ. Dja me nire kute Jeju marja akràn-mã amijo ba mexkumrêx, kwãrik wãnh amimex ne me my nokam mrãnh kêt. Dja ga me apijãm ne ar aba. Mỳkam dja ga me akrākàbito mex? Nã gãm me amikakrwỳnhmẽ akunhêrmẽ angãmẽ kubêkà mexmẽ o amimex ne ar aba. Me akrākàbit ne mex. Me my nomã amrãnh kadjybit aje amikrã ngrãnh, amikakrwỳnh, ne amimex, ja ne punu. Bep kati, me nire kute,

—Ba ije Jeju mar, anhỳrja dja apỳnh kabên mexo amip-tàn o amimex.

¹¹ Me kute Metĩndjwỳnhkôt abeno bikprõnhkam dja me nire anhikrên nhỳn Metĩndjwỳnh kabên maro nhỳ. Akràn-mã dja me Jeju nhõ me jao ba djwỳnh kabên maro nhỳn amijamakrekam kunhõ. ¹² Kwãrik wãnh me nire dja me me my jakre kêt ne me mymã kabên jarênh kêt ne. Nhym bep me my gêdja me me niremẽ me mymẽ me akre nhym me nire anhikrên me kabên maro nhỳ.

¹³ Mỳkam? Bir, Metĩndjwỳnh ne mybê Adão kumrêx nhipêx ne kam atãri nibê Ewa nhipêx ne. ¹⁴ Be djãm Xatanaj ne Adão noo akno? Kati, nija ne noo akno. Nhym

kam nija arým Metĩndjwýnhkam amikrà. Be, kam ne ba amã,

—Kwãrĩk wãnh me nire dja me me my jakre kêt, ane.

¹⁵ Nija ne te Metĩndjwýnhkam amikrà nhym mã Metĩndjwýnh kum me nire jabêkumrëx ne me kra bixadjwýr kutã me utã. Me nire kute Jeju marja gêdja me Jeju 'ãno dja ne mã kum me abêkumrëx ne kute mýjja punu 'õ mar prãm kêt kam gêdja mexo mexkumrëx ne mã me my nomã mrãnh kêt. Godja me ã kute anhýr jabej nhym Metĩndjwýnh me kra bixadjwýr kutã me utã nhym me kra me bĩn kêt ne.

3

Kute ar kute Jeju nhõ me jao ba djwýnhmã 'ã karõ.

Xit 1.6

¹ Be mrãmri ne me abenmã kum,

—Gêdja me'õ kute meo ba prãm jabej, kute Jeju nhõ me jao ba prãm jabej, mrãmri mexkumrëx. Nã, mrãmri mexkumrëx. Nã, kôt ne me kute arênhja.

² Be, mã gêdja Jeju nhõ me jao ba djwýnh kute? Me axwe kêt ne kute amijo ba mextire nhym kam me me'ã kabên kêtja, me prõ pýnh, me bixaêr punu kêt, me kute amipnênh ne ar ba, me kabôt kati, me kute meo djuw mex prãm, me kute memã Metĩndjwýnh'ã ujarênh prãm, me ja gêdja me Jeju nhõ me jao ba.

³ Kwãrĩk wãnh me kum kadjwati kangô* djãnh, me àkrê, me kute kabêno me apanh prãmja, me kute pi'òk kaprĩbit mar ne kute amim o àptàrja, kwãrĩk wãnh me ja gêdja me meo ba kêt ne. Bep kati, me ukaprĩmê, me kute umar mex marja dja me Jeju nhõ me jao ba.

* 3:3 Mýjja me kute o kôm ne kôt bibãnh kunĩja, kadjwati kangômê uba kangômê, mýjja kangô kunĩ ne me kum kadjwati kangô jarê.

⁴ Dja me'õ meo ba prãm jabej dja kumrêx amim prômê kra jakre, ne arkum mrãnh mextire gê ar omün kam adjwýnhdjwý kôt mrãnh mexkumrêx. Dja amim ar jao ba mex nhym kra amakkre mex ne kabênkôt ar amijo ba nhym kam arým kôt Jeju nhõ me jao ba. ⁵ Nok ren me'õja ar meo ban kam prômê kra jakre kêt kumrêx ne kam Metĩndjwýnh nhõ me jabit me akre, mã gêdja on? Mã gêdja kam nê? Ije, mýkam ne prômê kraja ar o ba mex kêt nhym kra jaxwe rá'ã? Ije kum bep nám ren amim prômê krawã kumrêx jakren kam ren kôt Metĩndjwýnh nhõ me ja jakre. Mýkam ne prômê krawã ar o ba kêt ne kam Metĩndjwýnh nhõ me jabit ar o ba?

⁶ Kwãrĩk wãnh me'õ ajbir kute Jejuo aminhõ ny'õ'ã Jeju nhõ me jao ba djwýnh mênh kêt. Mýkam? Bir, kute amiraxo àmra nhym kam ren Metĩndjwýnh kute o bikênh karõ dja me kute Jejuo aminhõ ny'õ'ã meo ba djwýnh mênh kêt. Ne ren amiraxo amra nhym ren Metĩndjwýnh o ajkê. Mrãmri kute Xatanajo bikênhja pyræk. Xatanaj kute amiraxo àmra nhym kam Metĩndjwýnh kute prĩne o bikênhja pyræk. Ne ren me'õ ajbir kute Jejuo aminhõ ne ren meo ban ren amijo amra, Xatanajkôt amijo amra nhym ren Metĩndjwýnh adjwýnhdjwý o ajkê.

⁷ Nhym bep kati, Jeju nhõ me jao ba djwýnh dja amijo ba mextire nhym kam me kàtãmdjwý kum kĩnh ne kum mex jarê. Nãm ren arĩk ar ba nhym kam me kàtãm rãn 'ã kabên ne. 'Ã kabên nhym kam rãn Xatanaj ikõta, Xatanaj meo ba djwýnhja nhikõta.

⁸ Nhym Jeju nhõ me jao ba djwýnh jatãri me àpên-hjadjwý dja me katàt mrã gê me me'ã kabên kêt. Dja me kabên mexmê me kabên punuo aben nhikjê kêt. Dja

me kum kadjwati kangô† djành kêt. Kwãrîk wãnh gê me pi'òk kaprî prãmebit me noo biknor prãm kêt. ⁹ Dja me amim Metîndjwýnh kukràdjà markumrëx ne 'ã ngrà tỳx ne. Metîndjwýnh kute me bamãbit amikukràdjào amirítja, kukràdjà tãmbit dja me 'ã ngrà tỳx ne maro ba ne mỳjja mexbit mar ar o ba. Mỳjja mexbit mar ar o ban kam amikam axwe 'õ mar kêt. Kadjy dja me Metîndjwýnh kukràdjà'ã ngrà tỳx ne ar o ba. ¹⁰ Dja me Jeju nhõ me jao ba djwýnh jatãri me àpênhja kumrëx kabi nhym me kabên mex ne kam ar kôt àpênh ba. Godja me mrãmri mexkumrëx jabej ne kam arým àpênh ar ba.

¹¹ Nhym Jeju nhõ me jao ba djwýnh jatãri me àpênh prõjadjwý. Me adjwýnhdjwý dja me katàt mrã gê me me'ã kabên kêt. Dja me me kà mex jarênh prãm kêt. Dja me bixaêr punu kêt ne ar ba. Dja me prîne mrãnh mextiren kabên pýnh ne arê. Dja ã Jeju nhõ me jao ba djwýnh jatãri me àpênh prõja ã ane.

¹² Be, Jeju nhõ me jao ba djwýnh jatãri me àpênh gêdja me prõ pýnh ne. Dja me õ kikre kumrëxkam amim ar ja jakren arkum mrãnh mexkumrëx gê ar omün kam adjwýnhdjwý kôt mrãnh mexkumrëx. Dja me amim krao ba mexkumrëx gê ar kabên mexkumrëx ne ar ba. ¹³ Godja me atãri me àpênhja mrãmri àpênh mex ne kam arým memã amimexo amirít nhym me kàtãmja arým me mex pumün kam kum me kïnh. Gêdja mekam amikam pijàm kêt ne kàjmã djan tu memã Jeju'ã ajarê. Me kute amim Kritu Jeju mar tùmkam tu memã 'ã ajarê. Bir be, dja ã Jeju nhõ me jao ba djwýnhmê atãri me àpênhmê ã ane.

¹⁴ Be, nã bãm amã ikabên'ã pi'òk no'òk ne amikukãm ano. Dja ba ï wãm kôt tẽ. Nã bãm amim itêm djà ma.

† 3:8 Mỳjja me kute o kôm ne kôt bibãnh kunĩja, kadjwati kangômẽ uba kangômẽ, mỳjja kangô kunĩ ne me kum kadjwati kangô jarê.

¹⁵ Nâr kon birâm dja ba amikrà ga pñine omün kam kôt memã arê, me kute mar kadjy. Metĩndjwýnh kra kunĩ kute kôt ar amijo ba mar kadjy. Kadjy ne ba amã pi'ók no'ók jano. Apýnh pyka kunĩkôt ne me bakwý arým amijo Jeju pytã nhym Metĩndjwýnh arým kôt me bajo kra. Gu me kôt arým apýnh banhõ pyka djãri kam aprakamã kôt aben pydji, Metĩndjwýnh tĩnjakôt mã pyka kunĩkôt aben pydji. Ne me kãtãmmã Metĩndjwýnh kabên jarênh ar o baba, Metĩndjwýnh 'êxnhĩ kêt ne kute katãt kabên jarênhja memã arênh ar o baba.

¹⁶ Bir be, djãm mýjja kakrit, djãm mýjja pñire, djãm mýjjao bikênh ne gu me arým amim kuman kam amim kamnhĩxbê ar baba? Djãm mýjja ngri: got me tebê kute mar ne ate krãmã? Mrãmri ne Jeju ra:xi.

Nãm amijo kubêngôkren[‡] kato.

Nhym Metĩndjwýnh Karõ kabin axwe kêt mã katon kôt memã arê.

Nhym kadjy mrãnh djwýnhdjwý arek omünh ar o ba.

Nhym me apýnh me õ pyka djãri kãj bê memã 'ã ujarêho ajmã.

Nhym me kam pyka kunĩkôt tu amim markumrêx ne.

Nhym kam Metĩndjwýnh kãjkwamã o wabi, õ kãjkwa mextiremã o wabi. Õ kãjkwa mexo kute pykabê mýjja kunĩ jakrenhjamã o wabi.

Nãm ã Jeju raxo ane.

4

Kubê me kabên 'êxnhĩ pyma.

[‡] 3:16 Kritu ne amijo kubêngôkre kute mrãmri ne apýnh me õ pyka djãri kunĩkôt me kunĩ: bêngôkreja pyrãk. Kubê kã jakamê me kakrãtykmê me babêngôkremê ne me kunĩ: bêngôkre. Me kamrômê me kukràdjã kunĩ kubêngôkreo aben pyrãk. Jakam dja ga Karõ 17.26 jarên ama.

¹ Be, akmere. Anhÿr djwÿnhrà̀m ne Metĩndjwÿnh Karõ arÿm prĩne me bamã arẽ, ne,

—Pyka kute o ino rer 'ÿrkam dja me kwÿ amibê Jeju kangan ate amijo ba. Arÿm kum kĩnh kêt ne kam ate me karõ 'êxnhĩja kabẽn ma, me karõ djujarẽn punubit man kôt amijo ba, ane.

² Nà, mrãmri me kwÿ dja me me karõ djô'ã me akre. Me ajkwao bit kute Jeju mar ne 'êxja, me tãm ne me òkre kadjwÿnhbê kute mÿjja punubit markam pijàm kêt mex ne arĩk 'êx ba ne me karõ 'êxnhĩ djô'ã me akre ne memã kum,

³ —Kwãrĩk wãnh abenwÿr mör kêt. Dja ga me tu akuprÿkumrêx ne ar aba, ane. Ne ajte mry'õ nàr me àkur djà'õ mekbê uman memã,

—Kwãrĩk wãnh krẽn kêt, ãm omũ, ane. Nhym bep kati, Metĩndjwÿnh ta ne me bamã mry, me badjàkur djà nhipêx, me baje 'ã kum amikĩnh jarẽn ne krẽn kadjy ne me bamã ipêx. Me baje amim Jeju markumrêx ne kam kôt baje mÿjja marja, me bamã ne Metĩndjwÿnh me banhõ kwÿ krẽn djà'ã apÿnh mÿjja nhipêx.

⁴ Be, mÿjja kunĩ Metĩndjwÿnh kute ipêxja ne mexkumrêx. Djãm mete mry nàr djwÿ'õ kanga kadjy ne Metĩndjwÿnh ipêx? Arkati, me kute Metĩndjwÿnhmã 'ã amikĩnh jarẽn ne tu kute amim byr ne krẽnmã ne ipêx. ⁵ Metĩndjwÿnh kabẽnkôt arÿm mrymẽ apÿnh me badjàkur djà mexkumrêx. Mÿjja kunĩ ne arÿm mexkumrêx. Gu me arÿm 'ã kum amikĩnh jarẽ nhym arÿm mexkumrêx.

⁶ Akmere, dja ga memã arẽ, me kute Jejukôt abeno kamymã ikabẽn ja jarẽ. Godja ga memã ikabẽn ja jarẽn arÿm mrãmri abê Kritu Jeju nhõ àpênhkumrêx. Nà, Metĩndjwÿnh kabẽn ne gu baje tu amim markumrêxja, kôt dja ga arek amijo tẽn amijo tẽn kam atÿxkumrêx. Jeju

kukràdjà mexkumrêx, tãm ne ga arým kôt amijo tẽ. Dja ga arek kôt amijo tẽn amijo tẽn arým atýxkumrêx. Atýx ne arým Kritu Jejumã adjàpênh mex ne.

⁷ Nhyr bep me tũmre'ã ujarênh kajgoja dja wãnh nõ. Tãm ne punu. Kati, dja ga prĩne Metĩndjwýnh kukràdjákôt amijo tẽ. Katàt amrãnh kadjy dja ga arek amijo tẽn arek amijo tẽn kam amityxmã amijakre. Djãm akrãkà'ã ne ba amã ane? Kati, akadjwýnhbê atýx'ã ne ba amã ane.

⁸ Mrãmri ne me ĩ krãkà týx kadjybit amijo djuw mex. Ja ne kàjbê mex. Nhyr bep me kadjwýnhbê me týxja mete Metĩndjwýnh kukràdjákôt amijo tẽmkam týx, ja ne mrãmri mexkumrêx, tũmrãm mexkumrêx. Pyka jakam gu badjumar mex ne ar baba kadjy mex. Ne kam ajte batyk nhijukri akubyn batĩnkam kadjy mexkumrêx. Kadjy ne ba amã,

—Metĩndjwýnh kukràdjákôt amijo tẽn kam kôt atýx, kôt amex, ane.

⁹ Mrãmri ne kabẽnja nhyr me abenmã arẽ. Kabẽn ja dja me tu markumrêx ne amijamakkrekam nhõrkumrêx.

¹⁰ Metĩndjwýnh kute me kunĩ pytãr djwýnh, bep me baje amikajmãtã marja ne mrãmri kubê me bapytãr djwý:nhkumrêx. Mrãmri ne gu me amim Metĩndjwýnh kamnhĩxbê ar baba, Metĩndjwýnh tĩnja kamnhĩxbê ar baba. Kam ne gu amikukãm kuman kam badjãpênh rax ne memã arẽnhõ tẽ, batyk djã kêt ne memã arẽnhõ tẽ.

Metĩndjwýnhmã àpênhkumrêxmã kum 'ã karõ.

¹¹ Be, akmere, dja ga apijãm kêt ne tu memã ikabẽn ja jarẽn memã Metĩndjwýnh kukràdjã jarẽ. ¹² Kwãrik wãnh gê me amã,

—Ýgê, e kum djãm ajabatãnh ne ga ar me akreo aba, anhýr kêt. Bep kati, dja ga te ajbir ajabatãnh ne mã katàt mrã gê me ajã amijakre, me kute amim Jeju marja ajã amijakre. Kadjy dja ga akabẽn mexbit jarênh ar o aban

amrãnh mex ne amã me abên amim Jeju markumrêx ne 'ã angrà tỳx ne aprõ prãm kêt ne ar aba. Dja ga ã ane nhym me ajã amijakren ã akudjwa amijo anhỹro bao ane.

¹³ Dja ga kàj bê memã Metĩndjwỳnh kabên jarên memã Metĩndjwỳnh kabêno amirĩt ne memã kukràdjà jarẽ. Ja dja ga 'ãno adjãm rã'ã ba awỳr bôx. Ba ibê Paur dja ba awỳr bôx.

¹⁴ Amrêbê ne me kute Metĩndjwỳnh kabên jarênh djwỳnh arỳm Metĩndjwỳnhmã adjan amã,

—Ë, Metĩndjwỳnh ne arỳm amijo apytà ga kum adjàpênhmã. Ta dja amã tỳx jadjà ga kam atỳx ne ar kum adjàpênh aba, ane. Nhym kutã Jeju nhõ me jao ba djwỳnh akrã'ã ikra jadjuw, ga kam Metĩndjwỳnhmã adjàpênh ar aba. Kwãrĩk wãnh Metĩndjwỳnh kute amim adjarwão abiknor kêt. Memã Metĩndjwỳnh kukràdjà jarênh 'ãno dja ne mã memã 'ã adjujarênh aba.

¹⁵ Be, dja ga ikabênja tu markumrêx ne amijamakkrekam anhôn kôt amijo mō. Dja ga ã amijo atêmo anen arỳm amrãnh mexkumrêxo tẽn o tẽn nhym me kunĩ arỳm amrãnh mexkôt apumũn kôt amã kato. ¹⁶ Ë, ajaxwebê amipnên amrãnh katàt kadjybit amima. Gora memã Metĩndjwỳnh kabên jarẽ. Gora memã arênh 'ãno dja. Godja ga anen arỳm amiptàn kam o me jadjwỳ pytà, me kute akabên maro ýrjadjwỳ pytà. Tãm ne ja.

5

Mebêngêttẽ me 'uwĩ'ã kum karõ.

A Xim 2.24

¹ Ë, godja me kute amim Jeju marwã 'õ, mebêngêtte 'õ, me'õkam amikrà, kwãrĩk wãnh ga kum abên tỳx kêt ne akrànãm kum akabên ne kum,

—Kwãrĩk wãnh ga ã anhỹr kêt, ane. Mrãmri ne me kra djwỳnh kute bãmmã kabênja pyrãk, akrànãm kum

akabên. Dja ga me kraremê me nôr nyreo akamyn me adjwýnhdjwýmã akabên mex jarê. ² Dja ga mebêngêx-teo anân me adjwýnhdjwýmã akrànãmã akabên. Dja ga me kra pýnhmê me kurerero akanikwýnhkumrêx ne memãdjwý katàt akabên jarên mekam apijãm ne meo akanikwýnhkumrêx. Dja ga ã me kute amim Jeju mar kunĩmã akabên jarêho ane.

³ Ê, akmere, ba amã me 'uwtĩ'ã karõ, ga amũ idjõ'ã memã arê. Me kute amim Jeju marwã kute akrànãmã mebê mjên tykjao djuw mexmã. Me kute amim Jeju marwã dja me me 'uwtĩbito djuw mex. ⁴ Nhym bep djãm me'õbê mjên ty nhym arým kra nàr kon tàmdjwý 'õ arým ta amim o djuw mex ne. Me'õ kra 'õ nã kute amim o djuw mex nhym abatàn ne arým amipãnh amim não djuw mex ne. Ne me'õ tàmdjwý 'õ kwatynh 'õ amim tàmdjwýo djuw mex ne. O djuw mex nhym abatàn ne kam amipãnh kwatynho djuw mex ne. Me kute mrãmri Metĩndjwýnh mar jabej dja ã õ kikre kumrêxkam amim me 'uwtĩo djuw mexo anen kam atãri amũ me jadjwý o djuw mex ne. Kam ne Metĩndjwýnh arým mekam kĩnhkumrêx ne.

⁵⁻⁶ Ate gêdja me'õbê mjên ty nhym arĩk ar ba. Nãm amidjwýnhbit amiman ar amijo ba. Ne kam kute me'õ tyk pyræk. Tĩnri kute me'õ tyk pyræk, kute Metĩndjwýnh mar kêt kam, arĩk ar bakam. 'Uwtĩ kajgo ne wã. Kwãrĩk wãnh me wã. Me tãm dja gar aje Jeju marwã o djuw mex kêt. Nhym bep atemã me'õ mjên kubê tyk nhym kam ate: ar ba ne kam amijã Metĩndjwýnh kamnhĩxkumrêx ne kam kum kabên ne kum amijo a'uwn kam ajte jãm me jao akêx ne ajte kum meo a'uw. Akamàtkammê a'urimê kum kabên 'ãno dja. Me'õ tãm ne mrãmri 'uwtĩkumrêx. Tãmbit dja gar aje Jeju marwã o djuw mex ne.

⁷ Dja ga memã ikabên ja jarê gê me'õ kra nàr kon me'õ tàmdjwý õbikwa 'uwtĩo djuw mex. Dja o djuw mex gê me

'ã kabên kêt. ⁸ Godja me kute amim Jeju mar 'õ ta ũrkwã djwýnhkam amim me jao djuw mex kêt ne kam arým mrãmri axwen arým Jeju kabên kanga, ne kute axweo me kâtãmja, me kute Jeju mar kêtja jakrenh mex ne.

⁹ Ë, ba amã me 'uwtĩ nhõ pi'òk'ã karõ. Dja ga me 'uwtĩ nhidji pi'òk no'òkkam anhõ, me kute amim Jeju marwã kute kôt meo djuw mex kadjy. Ë, kwãrik wãnh me abatàn nhbê mjên tykwã kwãrik wãnh me 'uwtìkôt pi'òk no'òkkam idji nhôr kêt. Kubê mjên tyk bêngêxtebit dja ga idji nhõ gê me kute amim Jeju mar meo djuw mex.

Djãm ori arým 'ã amex 60 apêx jabej? Djãm ori mjên tĩnri krõ'ã mjên kêt nhym kam kubê mjên tyk nhjukri me kute krõ'ã o prõ kêt jabej? ¹⁰ Djori kum mýjja mexbit kính ne ar o ba nhym me kunĩ arým kôt omün abenmã arênh jabej? Djori amikõpdji'ã kra jakreo tẽ nhym kudjwa mexkumrêx jabej? Djori õbikwa kêt kam meo djuw mex jabej? Djori prĩne Metĩndjwýnh nhõ me wão djuw mex ne memã õdjàn h jabej? Djori kum me umar punu kaprĩ jabej? Djori kute mýjja mexo amiptarkôt kute mýjja mexbit mar jabej? Djãm ori ã kute anhýr jabej mrãmri mexkumrêx, me 'uwtìkôt pi'òk no'òkkam idji nhõ, me kute amim Jeju marja kunĩ kute me 'uwtĩ jao djuw mex kadjy.

¹¹⁻¹² Nhym bep kwãrik wãnh ar abatàn nhbê mjên tykja kwãrik wãnh pi'òk no'òkkam me 'uwtĩ ro'ã idji nhôr kêt. Mýkam? Bir, ar 'uwtĩja kute õbê,

—Ba ikuprý gê me'õ iwýr mõr kêt kumrêx. Ba tu Kritumã idjapên hbit, anhýrja tu o aknon ajte kum me my kính nhym me'õ 'ýr mõr prãme kum Kritu kính kêt ne kubê amijo akêx nhym me arým 'ã kabên ne.

¹³ Nhym ar kam kum ukangabit ma ne kam kikremã ipõko tẽ. Djãm arkum ukangabit? Kati, nãm ar kabên prãmdjwý, ne me'ã kabên tẽ, me pijàm djàbit, mýjja punubit jarênho tẽ.

¹⁴ Kam ne ba memã kum,
 —Dja ar abatành nybê mjên tyk ajte mjên ne kam amim kra mỳ ne kramê mjêno djuw mex ne akrànãmã àpênh ar ba. Be, nã bãm ã ar abatành nybê mjên tykjamã ane. Mỳkam? Bir, me bakurê djwỳnh kute me bajã kabên kêt kadjy. ¹⁵ Bir be, Ar kubê mjên tyk kwỳ arỳm Jeju kangan Xatanajkôt amijo ba. Kam ne ba amã arê.

¹⁶ Nhyr bep me kute amim Jeju mar ni 'õ nàr my 'õ òbikwabê mjên tyk jabej ta dja amim òbikwa 'uwtĩo djuw mex. Nhyr ate me kute Jejukôt aben pydjija gêdja me'õ 'uwtĩkumrêx ne ate: ar bajao djuw mex ne.

Me kute kàjmã meo ba djwỳnh kamênhmã.

¹⁷ Ë, me jadjwỳ. Jeju nhõ me jao ba djwỳnh kute prĩne meo baja, ar tãm dja me kàjmã me kamê. Jeju nhõ me jao ba djwỳnh kute memã Metĩndjwỳnh kabên jarênh ne kute memã o amirĩtkam àpênh rax. Me tãm dja me mrãmri kàjmã me kamên memã o pãnh mex ne. Ar kute memã Metĩndjwỳnh kabên jarênh pãnh.

¹⁸ Kam ne Metĩndjwỳnh kabên'ã pi'òk no'òkkam memã,
 —Mryti kute amã àpênh ar ba ne kute amã bàygogo 'ykà ka'uko ipòko ãmja kwārĩk wãnh inhu djuwpre kêt gê ta àpênh pãnh àkur tẽ. Nãm mryti'ã Metĩndjwỳnh nhõ me jao ba djwỳnh jakren àkur'ã kum pãnh jakre. Jeju nhõ me jao ba djwỳnhmã me kute o pãnhmã. Ne ajte Metĩndjwỳnh kabênkam ne,

—Me àpênh ne pãnh, ane. Me àpênh me mǎnhkutã tãm gêdja memã o pãnh, ane. Kam ne ba amã,

—Dja me Jeju nhõ me jao ba djwỳnhmã o pãnh mex, ane.

¹⁹ Ë, mỳjja 'òdjwỳ dja ba amã arê. Gêdja me Jeju nhõ me jao ba djwỳnh'ã kabên ne arĩk me kàtàm jarê ga tu ate akrã. Djãm me 'èxnhĩ kêt got. Nhyr bep me'õ ar amǎnhkrut nàr kon amǎnhkrut ne ikjê kêt ne mrãmri kute

noo axwekôt omũnh ne axikôt arênh ga kam arým tu 'ÿr tẽn kum akabên jarê gê amim kato. ²⁰ Godja mrãmri Jeju nhõ me jao ba djwýnh kute mekam axwe jabej dja ga tu me kute amim Jeju mar nhipôkri kum abên tÿx, me kute maro ÿrja tĩn prãm ne axwe kêt kadjy.

²¹ Ë, ba amã mÿjja 'ôdjwÿ jarê. Dja ga tu memã akabêno aben pyræk. Dja ga tu me kunĩmã axikôt akabên.

Ë, Metĩndjwýnhmê Kritu Jejumê Metĩndjwýnh kute amijo kadjy mrãnh djwýnh pytâr ja, ar kute ikabên mar ne ikôt kabênkam ne ba mrãmri tu amã ikabên jarê.

Ë, gora ikabên ja ma. Ikabên kunĩ ma, prĩne ikabên ja ma. Ë, dja ga me kunĩmã akabêno aben pyræk. Kwãrĩk wãnh me umaje anhökre kadjwýnhbê amim,

—Be, inhõbikwa ne ja. Ba kum ikabên kêt, anhÿr kêt. Dja te anhõbikwa, ga tu kum akabên jarê, apijàm kêt ne tu kum akabên jarê.

Nâr kon, kwãrĩk wãnh anhökre kadjwýnhbê amim,

—Be, tãwã ne õbikwa krãptĩ. Ba kum ikabên kêt, anhÿr kêt. Dja te õbikwa krãptĩ ga tu kum akabên jarê, amã me uma kêt ne tu kum akabên jarê. Dja ga tu me kunĩmã akabêno aben pyræk.

²² Ë, kwãrĩk wãnh ga arĩk aje me kabi kêt kam Metĩndjwýnhmã me umjÿr kêt, kum àpênh kadjy kum me umjÿr ne 'ã anhikra jadjwÿr kêt. Dja ga anen ano katon tu mar kêt ne Metĩndjwýnhmã me'õ dja nhym arým mekam amikrào ba jabej ga kam ga mãn kute ajaxwe pyræk. Kwãrĩk wãnh ã anhÿr kêt ne mekôt ajaxwe kêt. Ga dja ga tu katàt mrã.

²³ Ë, atikkrekam akanê prãm kam ne ga akanê prãm ne. Kadjy dja ga uba kangô kwÿ ikõ. Uba kangômê ngômê apÿnh dja ga o akõmo tẽ.

²⁴ Ë, me kwỳ ne me axwekam amirĩtkumrêx. Nhyim me kunĩ kôt omũn arênho kumex. Nhyim kam me memã axwe pãnh jarẽ. Nhyim bep me kwỳ ne me axwekam amirĩt kêt ne. Metĩndjwỳnh gêdja tũmràm memã o amirĩt ne memã kum katon memã pãnh jarẽ nhyim me kam kôt omũ. ²⁵ Nhyim me mexdjwỳ ne me amirĩt ne. Nhyim me abenmã me arẽ. Nhyim me kwỳ apdju ne. Djãm mrãmri tu bipdjurkumrêx? Kati, Metĩndjwỳnh gêdja tũmràm memã me mexo amirĩt ne, nhyim me arỳm kôt omũ.

6

Me ò àpênh kajgoja'ã kum karõ.

Ep 6.5; Kor 3.22; Xit 2.9; Ped k 2.18

¹ Ë, akmere, dja ga me memã àpênh kajgo ar bawã, me kute meo pãnh ne amim me pa 'amỳnh nhyim me memã àpênh kajgo ar ba ne kute amim Jeju mar wãdjwỳmã arẽ gê me ò bẽnjadjwỳr kabên kôt amijo ban prĩne kabên ma. Mỳkam? Bir, me kàtàm kute Metĩndjwỳnh japyrỳ kêt kadjy, ne kute Metĩndjwỳnh kukràdjàdjwỳ japyrỳ kêt kadjy. ² Dja ga ajte me memã àpênh kajgo ar bawãmã kum,

—Ë, djori ar anhõ bẽnjadjwỳrwã ar akudjwa kute Jeju mar jabej kwãrĩk wãnh gar amã kurê kêt. Djãm ar aje Jejukôt abeno akamykam amã kurêmã got. Arkati. Dja gar tu kum adjàpênh mextire ne ar aba. Mỳkam? Bir, ar akamymã ne gar apê. Kute Jeju mar 'õ, Metĩndjwỳnh kum abê 'õ, kumã ne gar apê. Kam dja gar kum adjàpênh mextire ne ar aba, ane. ã me pardjamã ane.

Ë, gora prĩne memã ikabên ja jarên ikabên jao amirĩto aba.

Nêkrêxkôtbit me umarja ne me umar mex kêtumrêx.

³⁻⁴ Godja me'õ atemã kabên 'õ jarênho ku'ê prãm jabej arỳm amijo ajkên kam Bẽnjadjwỳr Jeju Kritu kabên mexja

kubê kînh no kati ne kam kôt kabên kêt ne. Ne ajte Metîndjwýnh kute katàt gu bakrã pymjÿr'ã ujarênhja kubê kînh no kati ne kam kôt kabên kêt ne. Mrãmri ne 'êx ne amiraxbito amran kam kute mÿjja mar kêt mexi. Nãm ajbãn ajmãn me kukràdjã kajgo mex mÿr jabej memã akij. Ne kam kabêno me apanhbit mar prãm. Å me kute anhÿr ne punu. Nãm me ã anhÿr ban kam mÿjja kukràdjã'ã ngryk ne abenbê meo bikjêro ban aben japry ne aben kamnhîx ar o ban⁵ mã kabêno aben japanh ar o ba. Mÿjwã ne arÿm me ja djumar djã ajmã o nhym me arÿm katàt kabênkumrêxja mar kêt. Nãm me nêkrêx prãme 'êx ne we,

—Be, ba amijo Jeju mar gê inhõ nêkrêx kumex ba kam amimexkumrêx ne, ane. Nãm me ã nêkrêx prãme amim 'ã karõo ane. Kam ne me abenkam axwe ar baja.

⁶ Mÿjkôt ne me umar mex ne amimex ar o ba? Bir, me kute Metîndjwýnh kukràdjãkôt amijo ba ne nêkrêx jabej umar kêt kam ne me umar mex ne ba. Ne amidjumar mexwão amimex ar o ba. ⁷ Mÿj ne gu me banã tikkre kurÿm amÿn o axidjuw? Kati, nã gu me banhÿkam axidjuw. Me batykkamdjwÿ, mÿj ne gu me amÿn o banhikwãn ty? Kati, nãm gu me banhÿkam banhikwãn ty.

⁸ Bir be, dja me banhõ kwÿ krên djãmê me banhõ kubêkã jabej, mrãmri, me bamãnhkutã. Kam dja gu me badjumar mex ne atemã mÿjja 'õ jabej kêt. Metîndjwýnh dja me bajo djuw mex ne. ⁹ Nhym bep me kute amim nêkrêx nàr pi'ók kaprïo àptàr ne kute o amimexja dja me amijo ajkê. Nãm me nêkrêx prãme ar axwe ba ne kam te kum nêkrêx prãm kêt mã ne mã nêkrêxbit ma. Ne kum mÿjja kakritmê mÿjja punubit kînh ne kôt arÿm amijo ajkê ne kam arÿm tu biknorkumrêx ne.

¹⁰ Bir be, nãm me ã kum nêkrêx nàr pi'ók kaprïbit kînh

ne ã amijo ane. Ne arÿm amijo bikënh mex ne. Mÿkam? Bir, nãm me kum nèkrëxbit kÿnh ne kam ajbit man kam kôt apÿnh axwe djari kunikôt amijo ba. Memã nèkrëx prãm kwÿ ne me arÿm Jeju mar kangan kam arÿm amijo ajkë, kaprïo prÿne amijo ajkë.

Akubyn Ximoximã kute katàt amijo bamã 'ã karõ.

¹¹ NhyM bep ga, akmere, ga abê Metÿndjwÿnh nhõ àpênhkam dja ga mÿjja ja kunĩmã akre rax ne. Katàt amrãnh kadjy mÿjja jamã akre rax. Katàt amrãnh ne aje Metÿndjwÿnh kukràdjàkôt amijo aban aje amim Jeju kamnhĩxbê ar aban amã me abên aje akrànãmã amijo atëm, kam dja me ajo ajkë ga mã aje akrànãmã amijo atëm ne anhĩ djuwbôn ar abamã, tãm dja ga ama.

¹² Me kute amim Jeju mar ne kôt amijo tëm ne kute me kute aben rer pyræk. Me kute aben rerkam ne me tÿx ne prõtobit prõt ne mebê apôx. Kam dja ga 'ã amijakren ã atÿxo anen mã Jejukôt amijo tẽ, kute me prõtja pyræk. Gora ga ã anen kam atyk nhijukri atÿn rã'ã rã'ã rã'ã 'ÿr tu abôxkumrëxmã. Kadjy ne Metÿndjwÿnh amiwÿr ajuw. Kadjy ne ga me ipôkri memã katàt amijarënh mex ne. Nã gãm memã kum,

—Be, arÿm ne ba tu amikajmã'ã Jeju markumrëx, ane. Nã gãm ane, nhyM me apumũ. Kam ne ba amã,

—Arek amijo tën kam atyk nhijukri atÿn rã'ã rã'ã rã'ã 'ÿr tu abôxkumrëx, ane.

¹³ Ë, Metÿndjwÿnhmẽ Jeju Kritu ar kute ikabën mar ne ikôt kabënkam ne ba amã ikabën jarë. Metÿndjwÿnh ne mÿjja kunïo tÿn djwÿnh. Ta ne kute ikabën mar ne ikôt kabën. Kam ne ba amã ikabën jarë. NhyM Kritu Jejudjwÿ kute katàt amijarënh mexja, kute bënjadjwÿrbê Põxu Piratu kabem katàt amijarënh mexja. Ar kute ikabën mar ne ikôt kabënkam ne ba amã ikabën jarë ne amã,

¹⁴ —Ë, gora prïne ikabên man kôt amijo aban kudjar kêt ne amrân̄h mextire gê me ajã kabên kêt. Dja ga mã ã anhÿro aba rã'ã nhym arÿm Jeju Kritu gu banhō Bēnjadjwÿr kato. ¹⁵ Dja õ akati arÿm 'ÿr bōx nhym Metĩndjwÿnh dja kum arē nhym arÿm bōx. Nà, Metĩndjwÿnh ta pydji ne memã Bēnjadjwÿr rax ne meo ba. Atemã 'õ kêt. Metĩndjwÿnh umar mex ne kĩnhkumrêx tãm ne Bēnjadjwÿr raxbê kumkatiti:. Kute bēnjadjwÿr raxo pykabê me bēnjadjwÿrja kunĩ jakrenh mexi. Kam ne kubê Bēnjadjwÿr raxbê kumkatiti: ne meo ba. ¹⁶ Ajbit pydji ne tyk prãm kêtumrêx, tĩn rã'ã: tĩn djwÿnh. Ne irãkam ar ba, arngrokam ar ba. Nãm kam axwe 'õ kêt. Kam gēdja me tēp kêtumrêx. Nhÿnh got me'õ arÿm noo omũ? Arkati. Me'õ kute noo omũnh kêtumrêx. Dja tũmràm omũnh kêt rã'ã. Kumã dja me uma jarēnh rã'ã: rã'ã. Tãm dja me kãjmã kamēnh rã'ã rã'ã. Gēdja memã Bēnjadjwÿr ne meo ba rã'ã rã'ã. Mrãmri.

¹⁷ Ë, me pykakam õ nēkrêx kumexmã dja ga,

—Amijo arax kêt. Djãm nēkrêx kute me apytarmã ne ga me nēkrêx kanàrràm ar aba? Kati, kwārĩk wãnh. Nēkrêx ne kajgo ne me abê biknor prãm. Kati, dja ga me Metĩndjwÿnh kanàrràm ar aba. Metĩndjwÿnh ta ne kute òdjàn̄hkôt me bamã mÿjja kunĩ nhōr, o kute me bakĩnh kadjy, ta kanàrràm dja ga me ar aba, ane. ¹⁸ Gora me akabên mexbit jarē ne mekam adjukaprĩn ar meo aba, ne memã anhōdjàn̄h ne memã anhō mÿjja ngrà, ane.

¹⁹ Dja ga ã me õ nēkrêx krãptĩjamã arēnhō ane gê me ã anen kam arÿm amityk nhijukri kadjy atemã kãjkwakam nēkrêxo aptã. Nēkrêx tãm ne mekbê biknor prãm kêt ne memã nōr rã'ã. Dja me kam arÿm 'ÿr bōx, mrãmri tu amitĩnkumrêx ja'ÿr bōx.

²⁰ Ë, Ximoxi, Metĩndjwÿnh kute amã kukràdjã rerja gora prïne omũ. Gora 'ãno djan omũnh tÿx. Me kabên kajgo,

me kaběn tům dja wānh nō. Rům kum akre rax. Nhy
me 'êxri amijo kute mỳjja mar ne kam mỳr jabej abenkam
kangati dja adjwỳnhdjwỳ wānh nō. ²¹ Mrāmri ne me kwỳ
kupa'ā,

—Ije mỳjja mar, anen kam ajbit mar ar o ba ne
kam amibê arỳm Jeju mar kanga ne. Gê Metĩndjwỳnh
ukapřĩkôt přĩne ajo djuw mex. Tām ne ja.

Metĩndjwỳnh Kute Memã Kabẽ Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

